



«Hitzegin» plataformaren atzoko aurkezpena Bilbon.

XOUSE SIMAL

‘Egin-en’ aldeko manifestazioa izango da Bilbon hilaren 18an

Intelektual talde batek osatutako Hitzegin plataformaren eskutik

Atzo plazaratu zen Hitzegin plataformak legeztaturiko manifestaziora deitu du bihar zortzirako “Egin-ekin” adierazpen askatasunaren alde’ lemapean. Manifestazioa arratsaldeko bost t’erdietan abiatuko da Bilboko Aita Donostia plazatik eta udaletxean amaituko da. Aurkezpena euskal kulturako zortzi lagunen esku egon zen.

IÑAKI URIARTE / BILBO

‘Egin’ egunkarian idatzi ohi duten kolaboratzaileek eta kultura zein kirol munduko pertsona ezagunek Hitzegin plataforma eratu dute egunkari horrek aurrera egiteko daukan eskubidea aldarrikatzeko. Alfonso Sastrek abenduaren lehen idatzi zuen ‘Salatzen dut’ iritzi artikuluan azaldu ziren ideien inguruan bildu dira. ‘Egin-en’ argitara eman duten manifestuarekin bat datozen ehundaka pertsona eta talderen atxikimendua lortu dute. Sinadura bilketa irekia dago oraindik.

Alfonso Sastre oso kritiko azaldu zen arte eta kultura munduko pertsonen gai honen inguruan izan duten jarreragatik. «Komunikabide hau deuseztatzeke nahiaren inguruan, intelektualen aldetik ezin espero zitekeen isiluntasuna baino?» galdetu zuen idazle madrildarrak. Bere ustez «ez da zilegi ideien komunikaziora eta berrien zabal-kuntzara dedikatzen diren pertsonak isilik geratzea».

Atzoko aurkezpenean Alfonso Sastrekin batera beste hainbat aurpegi ezagun izan ziren. Bertan zeuden Jose Mari Esparza Txa-

laparta argitaletxeko arduraduna, Martin Zabaleta Everestera igo zen lehen mendizale euskalduna, Iñaki Antigüedad EHUKo irakasle eta parlamentaria, Jon Maia bertsolaria, Edorta Jimenez idazlea, Karlos Yuste sexologoa eta Joseba Macias Egin Irratiko zuzendaria ere. Hitzegin taldeko kide dira, halaber, Txillardegia, Iñaki Berazategi kazetaria, Sabino Cuadra eta Fermin Muguruza Negu Gorriak rock taldeko abeslaria, besteak beste.

EPAILEN ZEREGINA ORDEZKATU

Sastrek gogor salatu zuen Juan Maria Atutxaren jokabidea, bere ustez «arlo juridikoaren funtzioak bere gain hartu dituelako». Idazlearen ustez, Barne sailburua epaileen to-

kian jarritz, «heriotza zigorra» ezarri nahi dio ‘Egin-i’ legez kanpo epaia emanaz.

Hitzegin plataformako eledunak esan zuen Hernani eta Bilboko egoitzen miaketa Entzutegi Nazionalaren agindupean izan bazen ere, berez gobernu agindu hutsa erabili zela. Entzutegi Nazionalak Francoren garaiko Ordena Publikoko Epaitegiaren kirasia daukala nabarmendu zuen.

Atutxari eginiko kritiken artean ez zen faltatu bat sekretupeko agiriak erakusteagatik. «Araketa egin eta gero Atutxak erakutsi zuen sekretupeko sumarioaren pean egon beharko zuen agiri bat» salatu zuen. Sastrenen ustez ez da bidezko burukide politikoek arazo politikoak gobernu bitartekoez konpondu nahi izana.

Kazetari eta arduradunek gaur deklaratu dute

I. U. / BILBO

■ ‘Egin’ egunkariko zuzendaritzako kide bik eta beste bi erredaktorek gaur deklaratu dute Madrilgo Entzutegi Nazionalen. Bueren epailearen aginduz bigarren deklaratu dute Ramon Uranga kontseilari ordezkariak, Iñaki Zapiain administrazio arduradunak eta Begoña Capape ikerketa taldeko erredaktoreak.

Beraiekin batera azalduko da Txema Garcia erredakzio talde horretako partaidea. Garcia abenduaren 2an izan zen Madrilgo deklarazioa egiteko, baina berandu zela eta, hurrengo egu-

nerako utzi zuen epaileak. Ostira-lean ere deklaratu gabe atzorako utzi zuen Bueren epaileak zita-zioa. Azkenik, Bueren epaileak atzoko hitzordua bertan behera utzi zuen eta gaurko eman dio.

Abenduaren 2rako deitua zegoen arren Pepe Rei kazetaria ez zen agertu Entzutegi Nazionalen bihotzeko operazio larri batetik osatzen ari zelako ospitalean. Jada etxean dagoen arren, oraingoan ez du jaso Bueren agindua.

‘Egin’ egunkariko lau langile horiek Iñigo Iruin eta Kepa Landa abokatuak izendatu dituzte beraien defentsa juridikorako.

Legebiltzarkideen soldatak eta dietak izoztu egin dituzte EAEn

F. I. / GASTEIZ

EAEko legebiltzarkideek eredu izan nahi dute krisi garaian. Bigarrenenez, 75 parlamentarien soldatak eta dietak izoztea erabaki zuten atzo Legebiltzarreko Mahaia egin zuen eskaera onartuz. Aurtan, iaz ez bezala, talde parlamentario bakoitzari taldea osatzeagatik eta eskainu bakoitzagatik dagokion laguntza igoerarik gabe geratu da.

Neurri hau funtzionarien soldatak izozteko erabakiarekin bat dator. Gaur Legebiltzarrean eztabaidatuko diren aurrekontuetan aurrikusita-koaren arabera, EAEko funtzionarien soldatek ez dute igoerarik izango, ezta Jaur-laritzako goi karguenek ere.

Joseba Leizaola Legebiltzarreko lehendakariak, beraz, 10.755.514 pezeta kobratuko ditu datorren urtean. Horrez gain, 1.386.168 pezeta izango ditu dietatan.

Lehendakariorde bakoitzak —Patxi Ormazabal (EA) eta Manuel Huertas (PSE-EE)— 7.346.010 pezetako soldata izango du, eta 1.386.168 pezeta dieta gisa. Mahaiko idazkari bakoitzak —Carmelo Barrio (PP) eta Pablo Ruiz de Gordejuela (EUE)— 5.929.014 pezeta kobratuko ditu, eta dieten bidez beste 1.140.684 pezeta.

TALDE BAKOITZAREN KOPURUA

Gainontzeko parlamentarien soldata 3.994.746 pezetakoa izango da. Kopuru honi dietak eta bidaietako



Joseba Leizaola.

OLALDE

gastuak gehitu behar zaizkio. Bizkaiko parlamentariak 1.711.020 pezeta kobratuko dituzte dieta gisa eta beste 570.336 pezeta bidaiak ordaintzeko. Kopuru hau berdina da parlamentari guztientzat, Araban edo Gipuzkoan bizi arren. Dietak, ordea, ez dira berdinak. Gipuzkoako parlamentari bakoitzak 1.711.020 pezeta kobratuko ditu eta arabarrek 1.140.684 pezeta.

Talde parlamentarioen dirulaguntzek ez dute 1994. urtean igoerarik izango. Talde bakoitzak —zazpi dira— 16.129.860 pezeta izango ditu eta eskainu bakoitzari dagokion laguntza 2.017.224 pezetakoa izango da.

Legebiltzarreko parlamentarien aurrekontua, guztira, 743.690.494 pezetakoa izango da. Zazpik handiena soldata ordaintzeko erabiliko dute eta gainontzekoa dietak, bidaiak eta taldeei ordaintzeko.

Kontzentrazioak gaur Iruñean eta Donostian giza eskubideen alde

DONOSTIA

Gaurko Giza Eskubideen Nazioarteko Eguna dela eta, Senideak elkarteak kontzentrazioak deitu ditu arratsaldeko zortzietarako Donostian eta Iruñean. Donostiako deialdiak bat egingo du euskal preso, errefuxiatu eta deportatu politikoen ahaideek haien egoera salatu asmoz ostiralero Alderdi Ederlortegian egiten duten giza-katearekin.

Amnistiaren Aldeko Batzordeek eta Herri Batasunak deia egin dute bi kontzentrazioetan parte hartuz giza eskubideen bortxaketa salatzen.

Hain zuzen ere, AABen ustez, Euskal Herrian giza eskubideez hitz egitea «beren bortxaketaz hitz egitea da, hori baita Gobernu espainiarrak, epaile, alderdi politiko eta instituzioen babesarekin, presoan hondamendi politikoa lortzeko erabiltzen duen tres-

na». Jipoiak, isolamenduak, miaketak eta trasladoak orokortzearen ondorioz, presoak «izueren txantaiaren menpe» daudela salatu dute, eta Euskal Herrian biltzea eskatu dute beren giza eskubideen errespetua bermatzeko. Antoni Asuncion Barne ministroaren izendapenarekin presoan kontrako presioa gogortuko dela iritzi diote AABek.

Presoen salaketek adierazten dutenez, Estatu espainiarrean giza eskubideen bortxaketa «eguneroko kontua» da, HBren esanetan. «Espetxe politika irregularitatez josita dago, legeak etengabe zapaltzen ari dira eta presoan kolektiboaren defentsarik eza gero eta nabarmenagoa da», azaldu du alderdi abertzaleak eta gogora ekarri ditu Espainiako tortura kasuak salatuz Amnesty International-ek eta NBEk kaleratu dituzten txostenak.